

Carta nú uquie'e San Pablo lubee bene eyeche Efeso enu nzeli arqui' Jesucristo

Uxe'la Pablo saludo

1 Li'á Pablo, necaa tucu apóstol Jesucristo equie nú rnibiy'a Diose. Rquie'a carta quie' luhua li'ihoa enu neli nzeli arqui' stichia' Jesucristo, li'ihoa enu necala bee bene' Diose eyeche Efeso. **2** Diose Pa'ahua cuna Jesucristo enu rnibiy'a lua'ahua ri'inu nú cha nze'cahua cuna nú nzuxe arqui'hua.

Rri'i Diose nú nza nze'ca lu cuenda'
bee bene enu nzeli arqui' Jesucristo

3 Che'tsa Diose pa' Jesucristo enu rnibiy'a lua'ahua nú chiqui' ñia necanu, xne nee equie nú neca tucunecatse'ahua cuna Jesucristo, uri'ile'yalamu lia'ahua desde liñibe nu chiqui' rri'inu elietsa lua'ahua para nú chequie'ahua stichia'nú.

4 Li'inu ucañinu lia'ahua equie cuenda' Jesucristo hasta chenu lasca' acache' iliulabe para nú huañia'ahua nu lecaxi na'ahua lunu sin dula, **5** xne equie nú seca Diose lia'ahua, uri'inu nú riala nú aca'ahua bee lli'ñinu equie cuenda' Jesucristo, tucu nú urí'inu elliebacu'

nú acane. **6** Enze'e, la tsana'ahua nú sucu' aya'ahua Diose equie nú chiqui' ñia necanu, xne urí'i le'yalamu lia'ahua equie cuenda' Lli'ñinu Jesucristo enu secanu. **7** Xne udixiulanu equie cuenda' stula'ahua chenu uri'chia rene'nú lu cruse nu scua uri'ilá Diose perdona stula'ahua enze'e rlube' nú chiqui' secanu lia'ahua. **8** Enze'e chiqui' lia uliqui'nu lunú reca elliebacu'ahua cuna nú rria'ahua beya', **9** nu ulube'lalu lua'ahua xa neca elliebacu'nu hasta hua'tu tucu nú uri'inu elliebacu' nú acane. **10** Nu elliebacu'cua' tsalunu chenu riña bichia ze'e, Diose tsa'na ye nú nu' liñibe cuna beenú nu' lu iliulabe ya Jesucristo.

11 Le'ca equie nú neca tucu neca'tse'ahua cuna Jesucristo, ucañila Diose lia'ahua para nú aca'ahua bee bene'nu tucu nú udu' arqui'nu nú ri'inu hasta chenu lasca acache' iliulabe, xne li'inu rrinu yeene tucu nú niarqui'nu nú acane. **12** Nu li'inu uri'ilanu scua para nú lia'ahua enu rluti uyalí arqui' Jesucristo, aca'ahua enu zucu'

ayaa Diose equie nú rnibiya'nu.
13 Le'ca li'ihua chenu ubene'hua stichia'nú nü neli neca nü xa tsila'ahua, che uyalí arqui'ahua Jesucristo nu unga tucu necatsehua cuna li'inu. Nu tucu nü uni Diose nü liqui'nu Espíritu Santo luhua, nu nee nü nzula Espíritu Santo cuna li'ihua, li'inu necanu xi neca tucu sello nü rlube' nü necalahua para Diose. **14** Equie nü nzula Espíritu Santo cuna lia'ahua enze'e yucua'ahua erencia nü uni Diose nü liqui'nu lua'ahua, chenu ye bee bene'nu nucua'ala liñibe para nü la tsuxea'ahua nü sucu' aya'ahua Diose equie nü rnibiya'nu.

Rnacu' Pablo lu Diose nü dete'nu lunú aca elliebacu' bee bene'nu

15 Nu lunú nediyala nü nzeli arqui'ahua Jesucristo enu rnibiya', nu le'ca secahaha beelá bee bene' Diose, **16** la tsuxea nü rdetea che'tsa lu Diose equie cuenda'ahua cada chenu rnacua lunu. **17** Nu li'inu enu neca Diose enu rnibiya' desde liñibe, nu li'inu necanu pa' Jesucristo enu rnibiya' lua'ahua. Le'ca nacua lunu nü ri'inu nü aca elliebacu'ahua para nü ri'ihua beya' lunú lube'nu luhua para nü nze chululáhua li'inu. **18** Le'ca nacua lu Diose nü xa'lanu elliebacu'ahua para nü ri'ihua beya' xa neca equie nü nzuculuhua hasta chenu ucañinu li'ihua nu ri'ihua beya' nü le'ca chiqui' llene nu ñia neca erencia nü nu'che' Diose para bee bene'nu. **19** Le'ca rnacua lunu nü ri'ihua beya' nü chiqui' llene neca poder, nü rri'i elietsa lua'ahua nü nzeli arquia'ahua li'inu. Le'ca li'i poder llenecua' nü chiqui' ulube'

Diose lua'ahua, **20** chenu uri'inu nü uhuañi zeca Jesucristo, nu uzucu' Diose li'inu cue'tse Diose chubee liñibe, **21** elu udete'nu nü rnibiya'nu lunu nü máse seca lu ye elu rnibiya', cuna ye elu usticia cuna ye bee gobierno. Le'ca másela seca elu rnibiya'cua' lu ye bee elurnibya' nü nu' cuna nü nze chu'ulá lu iliulabe quie'. **22** Chequie utsa'na Diose ye bee elurnibya' cua' ya Jesucristo enu ucañinu para nü nibiya'nu lu ye bee bene enu nzeli arqui' li'inu. **23** Nu bee bene enu nzeli arqui' Jesucristo, li'inu neli nehuañinu cuna li'ibeella nu catse nzunu xne li'inu necanu enu rnibiya'li.

Utsila'a Diose lia'ahua equie nü secanu lia'ahua

2 Li'ihua ungahua xi neca bene enu ungutí lu Diose equie cuenda' bee dula cuna beenú necha neca **2**uri'ihua, uyanalahua inziu nü necha neca nu uri'ihua tucu nü niarqui' beze'lú nü ri'ihua, nu espíritu nü necha neca cua' neca enu nehuañi cuna bee bene enu la zucu' Stichia' Diose. **3** Ye'ahua le'ca scua uhuañia'ahua tucu nü niarqui'tsia'ahua, nu tucu nü necatsia elliebacua'ahua. Nu le'ca scua tucu nü riala bee bene enu la zucu' Stichia' Diose castiya, le'ca scua ayala'ahua castiya'nu. **4** Pero lunú chiqui' ñia rua'a arqui' Diose lia'ahua, nu lunú chiqui' secanu lia'ahua, **5**añinzaca nü unga'ahua xi neca bene enu ungutí lu Diose, equie cuenda' stula'ahua, pero nee rlu'cula'ahua elunehuañi cuna Jesucristo lu Diose. Equie nü chiqui' ñia necanu utsila'ahua. **6** Chenu

uri'etu nú uhuañi zeca Jesucristo lu eluti neca xi neca nú le'ca nua'ahua uhuañi zeca'ahua, nu le'ca neca xi neca nú nellunu'la'ahuanu liñibe. ⁷ Uri'i Diose scua para nú lube'nu lua'ahua bee bichia nú nze'talá nu chiqui' secanu lia'ahua nu ñia nze'canu lua'ahua equie cuenda' Jesucristo. ⁸ Lunú nze'ca Diose enze'e utsila'anu lia'ahua, la necane nu neca'ahua bene nze'ca lunu, sino que lunú nzeli arquia'ahua Jesucristo enze'e utsila'ahua. ⁹ Le'ca la necane equie nu uria'ahua nú neca nze'ca utsila'anu lia'ahua para nú lecati aca nellíña. ¹⁰ Xne Diose ureche' lia'ahua, nu equie cuenda' Jesucristo uche'enu arquia'ahua lunú necha uhuañia'ahua hua'tu para nú ria'ahua nú neca nze'ca, tucu nú uri'etu elliebacu' nú ria'ahua.

Equie cuenda' Jesucristo neca tucunecatse'ahua

¹¹ Enze'e li'ihua enu la neca bee bene Israel ullu'cu arqui'hua xa ulle'cahuá hasta hua'tu. Bee bene Israel uhualee li'ihua bee bene enu la uya' seña, xne li'ibeella nuya'beella seña tucu nú rnibiy'a ley, ¹² le'ca tiembu ze'e la chuluhua Jesucristo, nu la nebacu'hua leta bee bene Israel, nu le'ca la nebacu'hua lunú ucuaqui u'na Diose. Uhuañhua lu iliulabe quie' nu lecaxi nzuquie arqui'hua nu sin nú chuluhua Diose. ¹³ Pero nee nú nzelila arquia'ahua Jesucristo, li'ihua enu istu utsu arqui' lu Diose, nu nee ubet'a bicalahua lunu equie cuenda' rene' Jesucristo nú uri'chia lu cruse. ¹⁴ Xne Jesucristo neca

enu rri'i nú nzuxé arquia'ahua. Li'etu unitilunu elu rlee lunú rri'i nú la zela nú aca tucunecatse bee bene Israel cuna bee bene enu la neca bee bene Israel. ¹⁵ Nu equie nú unguti Jesucristo ulaxu yebee custumbre nú rnibiy'a ley lubee bee bene Israel nú rri'i beella, li'etu uri'etu nú unga tucunecatse bee bene Israel cuna bee bene enu la neca bee bene Israel xi neca tucu eyeche cuqui, xne neca tucunecatse'ahua cuna li'etu. Scua uri'etu nú uyu'u nú nzuxé arqui' bee bene. ¹⁶ Xne equie nú unguti Jesucristo lu cruse, ulaxu nú rlee bee bene Israel lubee bee enu la neca bee bene Israel, nu scua iguale uyala arqui' Diose lua'ahua lunú neca tucu necatse'ahua cuna Jesucristo.

¹⁷ Nu li'etu ubet'a tixiule'enu lubee bee bene Israel cuna lubee bee enu la neca bee bene Israel nú xa chu'u nú nzuxé arquia'ahua lu Diose. ¹⁸ Nu equie cuenda' Jesucristo sia bee bene Israel nu sia bee bene enu la neca bee bene Israel, rlu'cula'ahua tucu inzio nú riña'ahua lu Diose xne nzula Espíritu Santo'nu cuna lia'ahua. ¹⁹ Enze'e la neca'hua xi neca bene istu nu la neca'hua bene rene lu Diose sino que nebacu'lahua leta bee bene'nu, neca tucunecatsela'ahua cuna bee bene'nu. ²⁰ Li'ihua necahua xi neca tucu ni'i nú recache'e, nu bee apóstol cuna bee profeta neca beella xi neca cimiendu' ni'i quie', nu Jesucristo neca xi neca quiee nú neca equie uzibi' nú recache' ni'i quie'. ²¹ Nu ze'e uquixie riatsa

ni'i que nú rniru nú neca li'ihua, nu scua nze liqui nze'cae para nú aca tucu necatse'ahua indu' Diose cuna Jesucristo. ²²Nu nee nú neca tucu necatselahua cuna Jesucristo, le'ca neca tucu necatselahua cuna beela bee sa'ahua enu nzeli arqui' li'inu para nú aca'ahua tucu indu elu nehuañi Diose equie cuenda' Espíritu Santo.

**Ucañi Diose Pablo para nú
ixiule'ella stichia' Jesucristo lubee
bene enu laca bee bene Israel**

3 Enze'e li'á Pablo, nchiñia ni'cu' equie nú sibi'a lu Jesucristo para nú rri'á elietsa luhua enu laca bee bene Israel. ²Li'ihua nediyahua nú la yala ri'á riña' nú rri'á, pero lunú nze'ca Diose uliqui'nu riña' quie' rri'á para nú ri'á elietsa luhua nú ri'ihua beya' stichia'nu. ³Nu li'inu ulube'lalu lua xa neca elliebacu'nu hasta hua'tu, tucu nú unilá luhua lu tucu carta. ⁴Chenu ulahua carta cua' che ri'ihua beya' nú nediyala xa neca equie cuenda' Jesucristo nú la ri'i bee bene beya' hasta hua'tu. ⁵Bee tiembu nú udetela lecali ti uri'i beya' xa neca equie cuenda' Jesucristo, xne ungae xi neca tucu nú a'chi' neca lubee bene, pero nee equie cuenda' Espíritu Santo ulube'la Diose nucua' lubee apóstol cuna lubee profeta. ⁶Nu lunú unga xi neca nú a'chi' neca lubee bene, necane equie cuenda' bedichia' nze'ca' Jesucristo, nú le'ca bee bene enu laca bee bene Israel riala beella erencia nú riala bee bene Israel lunú neca tucunecatsela beella, nu nebaci'la beella lunú ucuaqui u'na Diose equie cuenda' Jesucristo.

⁷Li'á rixiule'a bedichia' nze'ca' Jesucristo lubee bene, la necane equie cuenda' nú riala nú ri'á scua sino que necane nú ñia nze'ca Diose enze'e lia uliqui'nu elurnibuya'cua' lua para nú zibi'a lunu. ⁸Li'á neca enu máse leca tineca lu ye bee bene' Diose, pero lunú ñia nze'ca Diose lia uliqui'nu lua nú ixiule'a lubee bene enu la neca bee bene Israel equie cuenda' eluxene' Jesucristo nú llene neca. ⁹Nu para nú ixiule'e nze'caa lu yebeella xa neca elliebacu' Diose enu ureche' ye nú nu', elliebacu' nú né chu alube'nu lubee bene. ¹⁰Para nú equie cuenda' bee bene enu nzeli arqui' Jesucristo ri'i ye bee enu rlu'cu nú rnibya' liñibe beya' nú Diose rlu'cu ye poder. ¹¹Nu hasta chenu lasca' quixie iliulabe urí'ilila Diose elliebacu' nú acane scua nu nee uyalulane equie cuenda' Jesucristo enu rnibya' lua'ahua. ¹²Nu equie nú nzelila arquia'ahua Jesucristo nú'la modo xa riña'ahua lu Diose sin nú lliquia'ahua chebica'ahua lunu. ¹³Enze'e nia luhua nú la tsunehuana arqui'hua lunú nehuana se'caa equie cuenda'hua, xne neca nze'ca nucua' para li'ihua.

Chiqui' seca Jesucristo lia'ahua

¹⁴Enze'e súlliquia lu Diose pa' Jesucristo enu rnibya' lua'ahua, ¹⁵li'inu enu rnibya' lu ye nú nu' liñibe cuna lu iliulabe. ¹⁶Rnacua lunu, nú lunú chiqui' rlu'cunu poder nú liqui'nu juerza'ahua cuna elurnibuya' luhua equie cuenda' Espíritu Santo para nú tsuta' arqui'hua lunu, ¹⁷nu huañihua cuna Jesucristo equie nú nzeli arqui'hua

li'linu para nú scua tucu nú neli nzenalahua eluseca'nu. ¹⁸Scua acahua ri'ihua beya' cuna beelá bee sa'hua enu nzeli arquia'ahua li'linu nú eluseca Diose chiqui' llene neca, nu ni' la ria'ahua beya' xa nia'ahua lunú chiqui' llene necane. ¹⁹Enze'e rnacua lu Diose nú chuluhua eluseca cua' nú chiqui' llene neca, nu másela llene necane luquelá nú rri'i bee bene elliebacu', nu scua neza'li nú huañihua cuna Diose.

²⁰Nu li'linu enu rlu'cu nú rnibiya' para nú ri'linu másela lunú rri'i bee bene elliebacu', urre másela lunú rnacu' bee bene lunu equie cuenda' Espíritu Santo'nu nú nzu cuna lia'ahua. ²¹Nu riala nú zucu' uya'ahua Diose ye bichia nu ye tiembu equie cuenda' Jesucristo, lia'ahua enu nzeli arquia'ahua Jesucristo. Amén.

Equie cuenda' Espíritu Santo neca tucu necatse'ahua

4 Li'á enu nchiñia ni'cu' lunú sibi'a lu Jesucristo, zequiea luhua nú scua tucu nú necalahua bee bene' Diose, uhuañihua tucu nú riala nú huañi bee bene enu necala bee bene'nu. ²Aca lle'na arqui'hua nu aca nze'cahua, nu tsuquie arqui'hua, nu uriqui'hua bee sa'hua lunú xi rri'linu beella li'ihua, equie nú secahua beella. ³Uzu'cu' luhua nú chenalaláhua nú neca tucu necatsehua cuna elietsa' Espíritu Santo, enu rliquipi' nú nzuxi arqui'hua, nu rri'i nú neca tucu necatsehua. ⁴Lia'ahua neca'ahua xi neca tucutsia bene, nu ye'ahua nzu Espíritu Santo cuna lia'ahua, nu scua tucu nú necala'ahua bee

bene' Diose le'ca scua tucutse nellua'aquie'ahua nú liqui'nu lua'ahua. ⁵Tucutsia enu rnibiya', tucutsia nú nzutenelí arquia'ahua, nu tucutsia elu rrinza nu!, ⁶xne nu' tucutsia Diose enu neca Pa'ahua nu li'linu rnibiya'nu lu ye'ahua. Nu li'linu rnibiya'nu lu ye beenú nu', nu nzunu cuna ye'ahua nu rria'ahua lunú niarqui'nu.

⁷Pero cada tucua'ahua utsula Jesucristo nú ria'ahua tucu nú uniarqui'nu nú ria'ahua. ⁸Tucu nú rni lu ichi' Stichia' Diose:

Chenu uquieno liñibe,
uri'linu ana lu ye bee elurnibiya',
nu udete'nu lubee bene lunú
rialá rri'i beella.

⁹Nu, ¿xi rni elu rni nú "uquieno liñibe"? Rni nucua' nú ube'tanu lu iliulabe. ¹⁰Nu Jesucristo enu ube'ta lu iliulabe, le'ca li'linu uquieno liñibe nu rnibiya'nu diquineca iliulabe. ¹¹Nu udete'lalu lubee bene lunú riala ri'ibeella, nu'beella enu uyala nú aca bee apóstol, le'ca nu'beella enu uyala aca bee profeta, nu nu' beella enu uyala nú ixiule'e stichia'nu lubee bene, nu le'ca nu' beella enu uyala nú ni bezete' nu zete' bee bene enu nzeli arqui' li'linu. ¹²Scua ucañi Jesucristo bee bene'nu para nú zete' beella beelá bee bene enu nzeli arqui' li'linu para nú scua aca beella zibi' beella lunu, nu nzechululá beella li'linu, ¹³hasta nú neza'lli nú nzeli arquia'ahua nú chulua'ahua lliñi Diose para nú ri'ililia'ahua beya' xa riala chenala'ahua Jesucristo tucu nú rialane. ¹⁴Chequie la aca neríña' nú zequieno bee bene lia'ahua xi sequieno bee bene bee

endu', la aca'ahua xi neca tucu nú ruya' bii enzichiu' enzerquie equie yelu beenú rdichia' bee enu rla'na nú xa modo zequieno bee bene. ¹⁵Sino que rqui'ña nú nia'ahua nú nelíneca nu chenala'ahuane cuna eluseca nú rlu'cua'ahua, nu lunú neca tucunecatse'ahua cuna Jesucristo enu rmibiya' lua'ahua chenala'ahua tucu nú niarqui'nu nú ria'ahua. ¹⁶Xne equie cuenda' Jesucristo iguale neca'ahua nu neca'ahua xi neca tucutsia bene, ye'ahua enu nzeli arqui' Jesucristo, xne equie cuenda'nu neca tucu necatse'ahua, nu cada tucua'ahua ria'ahua lunú riala ria'ahua para nú ria'ahua elietsa lubee sa'ahua, nu zeca'l'a'ahua bee sa'ahua.

Elunehuañi nú necuqui rliqui' Jesucristo

¹⁷Nu nee equie cuenda' Jesucristo nialuhua: La huañihua xi Nehuañi bee bene enu la chulu Diose, xne li'ibeei Nehuañitsiabeei lunú necatsia elliebacu'beei ¹⁸nú necabe neca elliebacu'beei. Nu la zucu'lubeei nú huañibeei tucu nú niarqui' Diose nú huañibeei, equie nú la ri'ibeei beya' nu nziti arqui'bee. ¹⁹Leca' xi zeca beeí nu utsana' arqui'labeei le'catsia li'ibeei nu rri'ibeei seidu nú nzeri'ibeei yelu clasia' beenú necha neca. ²⁰Pero li'ihua lá chuluhua Jesucristo para nú huañihua scua, ²¹tunu neli nú ubene'l'a'ahua lu cuenda'nu, nu neli nú ungalahua beenú neli neca nze'ta lunu. ²²Utsana arqui'hua lunú uhuañihua chenu lasca' chuluhua li'inu nucua' rnitilutsia li'ihua, xne bee

elliebacu' nú necha neca uzequieno li'ihua nu uri'itsiahua tucu nú uniarqui'itsiahua. ²³Uche'elihua xa necahua, ²⁴para nú acahua xi neca tucu bene cuqui enu ureche' Diose tucu nú niarqui'nu cuna tucu elunehuañi nú leca nú lixiu neca tucu nú rialane, equie cuenda' stichia'nu nú neli neca.

²⁵Enze'e la nia'hua eluquichia', uni'itsiahua nú neli neca lubee sa'hua xne neca tucu necatsela ye'ahua.

²⁶Tunu rlehua, la ri'ihua dula. La duche'hua elu rlecua' arqui'hua debichia. ²⁷Para nú la dete'hua luhuare nu ri'i beze'l'u ana luhua.

²⁸Bene enu rcachi' rqui'ña nú tsana'lla nú rcachi'lla, nu ri'illa riña' para nú equie riña' nze'ca nú rri'illa nu' modo ri'illa elietsa lubee bene enu nu' xi secala'cha'.

²⁹Le'ca la nihua bee bedichia' nú necha neca, uni'itsiahua puro bedichia' nze'ca nú ri'i elietsa nu zibi' lu beelá bee bene enu yene'e. ³⁰La ri'ihua nú tsúnehuana arqui' Espíritu Santo' Diose nú nzula cuna li'ihua xi neca tucu seña nú rlube' nú necalahua bee bene'nu para bichia nú riñahua lunu.

³¹Utsa'nahua tucu chu ye nú rlee nzu arqui'hua, nu elu rlee, nu elu rana arqui', cuna nú rixialihu lu sa'hua, cuna bee bedichia' chi'qui', cuna ye beenú necha neca. ³²Aca nze'cahu, nu uhua'a arqui'hua bee sa'hua nu uri'ihua perdona bee sa'hua tucu nú uri'i Diose perdona li'ihua equie cuenda' Jesucristo.

Xa riala huañi bee bene' Diose

5 Scua tucu nú necalahua lli'ñi Diose enu secanu, ula'nahua

nú ri'ihua tucu nú rri'inu. ²Huañi nze'cahua, uzechahua bee sa'hua tucu nú seca Jesucristo lia'ahua nú udete' cuendanu li'inu nú ungutinu equie cuenda'ahua, nu unganu xi neca tucu u'na nú ñia rlia para Diose.

³Li'ihua enu necala bee bene' Diose, la tsu neyi'hua nu ni' la yala nihua bee bedichia' nú necha see, cuna yelu beenú lecaxi zibi'. ⁴La nihua bee bedichia' nú necha see, ni' bee bedichia' nú lecaxi zibi' nu bee bedichia' nú la yala nihua, xne la neca nze'ca bee nucua!. Mejora ude'tehua che'tsa lu Diose. ⁵Xne nediyal'a'hua nú bee bene enu nehuañi lu eluhuexe, nu bee enu rri'i nú necha neca, nu bee enu neyi'rcua'a nu niarqui' lu'cu huaxi beenú lu'cu, máse seca beebee nucua' luquelá Diose, leca modo chu'u bee nze'e elurnibya' Jesucristo nu Diose. ⁶La zelahuá nú ti zequienu li'ihua cuna bee bedichia' nú lecaxi zibi', xne equie beenú lecaxi zibi' cua' nze'ta castiya' Diose lubee bene enu la zucu' stichia'nú. ⁷Enze'e la ri'ihua tucu nú rri'ibeei.

⁸Ante uhuañihua xi neca bene enu necabe elliebacu', pero nee lunú neca tucu necatselahuá cuna Jesucristo enu neca ellie'e luhua. Enze'e uhuañihua xi nehuañi bee bene enu nzenala ellie'e cua', ⁹xne lunú nzenala bee bene ellie'e cua', che rri'illa nú neca nze'ca, tucu nú rialane nu tucu nú neli neca. ¹⁰Ucua'nahua nú ri'ihua tucu nú riu' arqui' Diose. ¹¹La ri'ihua beenú la zibi' nú rri'i bee bene enu necabe nzu elliebacu', sino que uni'hua lubeei para nú ri'ibeei beya' lunú

rri'ibeei. ¹²Xne hasta rtu'bene ni lunú rri'i a'chi'bee. ¹³Pero equie cuenda' stichia' Jesucristo chu rri'ibeei beya' lunú rri'ibeei. ¹⁴Xne equie cuenda' stichia'nú rri'i bee bene beya' yeene. Enze'e rni lu ichi' Stichia' Diose:

Ude'te' ellie'e li'ilu enu nza
inziu nú necha neca,
utsana' arqui' stulalu che xa'l'a
Jesucristo elliebacu'lú.

¹⁵Enze'e ubi'yahua xa nehuañihua, xne la neca nú lia nehuañihua sino que ubi'yahua xa nehuañihua. ¹⁶Diquila nú nehuañihua la zelahuá nú lia xle'e dete bee bichia'hua, uhuañihua tucu nú riala huañihua, xne tiembu quie' necha nehuañi bee bene. ¹⁷Enze'e la huañihua lunú necatsia elliebacu'hua, sino que ucua'nahua nú ri'ihua beya' xa niarqui' Diose nú huañihua. ¹⁸La lluchi'hua, xne elu xuchi' cua' rnitilu bene, mejora uzelahuá nú nibiya'li Espíritu Santo luhua. ¹⁹Uni'hua lubee sa'hua bee Salmo, cuna bee himno, cuna bee canto nú neca para Diose, nu diquinu' arqui'hua ula'hua nuuzu'cu' ayahua Diose. ²⁰Nu equie cuenda' Jesucristo ude'tehua che'tsa lu Pa'ahua Diose ye bichia equie ye beenú rri'linu lua'ahua.

Xa riala nú huañi bee bene enu nzeli arqui' Jesucristo

²¹Uzu'cu'hua nú rni bee sa'hua equie nú rlu'cuhua ula'na lu Jesucristo.

²²Nu li'ihua bee una'a enu nechia uzu'cu'hua nú rni bee niyu'hua, tucu nú sucu'hua nú rni Jesucristo. ²³Xne niyu rnibya' lu una'i, tucu

nú rnibiya! Jesucristo lubee bene enu nzeli arqui' li'inu, li'inu enu utsila'a li'ibeei. ²⁴Nu le'ca scua tucu nú sucu' bee bene enu nzeli arqui' Jesucristo stichia'nú, le'ca scua bee una'a enu nechia rqui'ña nú zucu'hua nú rni bee niyu'hua tucu nú rialane.

²⁵Le'ca li'ihua bee niyu enu nechia uzecahua bee una'hua, tucu nú seca Jesucristo bee bene enu nzeli arqui' li'inu, nu hasta ungutinu equie cuenda'beella.

²⁶Para nú uquieenu li'ibeella lu cuenda' stula beella. Uquieenu li'ibeella equie cuenda' stichia'nú nu cuna equie cuenda' elu rrinza, ²⁷para nú ñia naa beella riña beella lunu nu lecaxi na beella, sin ni' tucu equiya nu ni' xitse stucu bee dula, sino que lecalí xi naa beella sin dula. ²⁸Le'ca scua bee niyu enu nechia rqui'ña nú zeca beella una'a beella, tucu nú seca beella li'ibeella. Nu enu seca una'a seca le'ca li'i.

²⁹Xne ni' tucu bene la chana arqui' le'catsia li'i, sino que rebaculla li'illa nu ri'yalla li'illa, tucu nú rri'i Jesucristo cuna lia'hua enu nzeli arqui' li'inu, ³⁰equie nú neca tucu necatse'ahua cuna li'inu. ³¹Enze'e tucu nú rni lu ichi! Stichia' Diose: "Tsa'na niyu pa'lla cuna na'lla para nú aca tucutsialla cuna una'lla, nu rucu beella aca beella xi neca tucutsia bene." ³²Chiqui' neríña' nú ri'i nze'ca bee bene beya' bee bedichia' quie', pero rniine xne le'ca scua neca Jesucristo cuna bee bene'nu. ³³Nee bee niyu uzecahua bee una'hua tucu nú secahua li'ihua, nu li'ihua bee una'a ulu'cuahua ula'na lubee niyu'hua.

6 Le'ca esquie li'ihua bee endu', uzu'cu'hua nú rni bee uzana'hua xne scua rialane, equie nú nzeli arqui'hua Jesucristo. ²Nu mandamiento rluti nú rni nú yucu cuenda'ahua lunú ucuaqui u'na Diose lua'ahua tunu zucua'ahua mandamiento nú rni: "Ulu'cu ula'na lu pa'lú cuna lu na'lú, ³para nú huañi nze'calu nu huañixeelu lu iliulabe quie!"

⁴Nu le'ca esquie li'ihua bee paa cuna bee naa, la detehua lunú rri'inuhua bee endu'hua para nú la leebeei equie cuenda' nucua', mejora ubi'ya nze'cahua li'ibeei, uni'hua bezete' lubeei nu uze'tehua li'ibeei tucu nú niarqui' Diose.

⁵Nu li'ihua bee enu rri'i riña' bee bene, uzu'cu'hua nú rni bene enu rri'ihua riña'lú lu iliulabe quie', nu diquinu' arqui'hua ulu'cuahua ula'na lubella, nu uzu'cu'hua nú rni beella, uri'ihua xineca nú rri'ihua riña' Jesucristo.

⁶Uri'ihua riña' beella, nu la ri'ihuane chenu ri'yatsia beella luhua para nú ya'na nze'cahua lubella, sino que uri'ihua riña' beella xi neca nú sibi'hua lu Jesucristo, equie nú neli rri'ihua tucu nú niarqui' Diose nú ri'ihua.

⁷Uri'ihua riña' beella diquinu' arqui'hua, uri'ihuane xi neca nú rri'ihua riña' Jesucristo xne la necatsiae riña' bee bene. ⁸Nu li'ihua nediyal'a'huá nú cada bee bene, mase nú necalla moso' urre lacalla moso', pero dete' Jesucristo lulla nú riala nú ati'lla equie nú neca nze'ca uri'illa.

⁹Le'ca esquie li'ihua bee patrón, aca nze'cahua lubee moso'hua, la

ri'ihua nú nehuana zeca beella. Xne li'ihua nediy'a'hua nu li'inu enu rnibiya' lubella nu luhua nzucunu liñibe nu ante lunu iguale neca ye bee bene.

Utsuta' arqui'hua lunú nzeli arqui'hua Jesucristo

¹⁰Le'ca nia luhua bee sa'a enu nzeli arquia'ahua Jesucristo nú utsuta' arqui'hua lunú neca tucu necatsela'ahua cuna li'inu, lunú chiqui' rnibiya'nú. ¹¹Ubi'yahua li'ihua cuna elietsa' Diose para nú tsuta' arqui'hua, nu para nú la ri'i beze'lu ana luhua nú zequienui li'ihua. ¹²Xne la liunua'ahua bee bene lu iliulabe quie', sino que rliunua'ahua cuna yelu clasia' bee benechiqui', sia bee enu rlu'cu nú rnibiya', cuna enu rlu'cu elu usticia, cuna ye beelá bee espíritu' beze'lu nú nu', nu rnibiya' lu iliulabe quie!. ¹³Enze'e ubi'yahua li'ihua cuna poder nú rliqui' Diose luhua para nú riqui'hua lu xitse beenú nehuana nze'ta zecahua, nu utsuta' arqui'hua mase secahua lunú secahua. ¹⁴Utsuta' arqui'hua lunú neli neca nú nediy'a'l'a'hua, nu uyanalahua tucu nú riala nú huañhua. ¹⁵Ucua'a tsíñahua para nú ixiule'ehua lubee bene bee bedichia' nze'ca' Jesucristo nú rri'i nú nzuxe arqui' bee bene lu Diose. ¹⁶Nu lu yeene la zañi'hua lunú nzu tenelí arqui'hua, nú neca nú rri'i elietsa luhua luye beenú necha neca nú nze'ta lu beze'lu. ¹⁷Nu lunú utsila'a Diose li'ihua nucua' neca nú recanu' li'ihua, nu

stichia'nu neca xi neca tucu espada nú rliqui' Espíritu Santo luhua. ¹⁸La tsana'hua nú rnacu'hua lu Diose.

Uzequiehua lunu nu una'cuahua lunu yebichia cuna elietsa' Espíritu Santo. Utsutsiñahua una'cuahua lunu nu la llaca'hua, nu una'cuahua lunu equie cuenda' ye bee bene'nu.

¹⁹Le'ca una'cuahua lu Diose lu cuendaa para nú liqui'nu bee bedichia' nú riala nia para nú aca ixiule'ene lubee bene sin nú lliquia, nu nia bee bedichia' nze'ca' Jesucristo nú rni nú xneca tsila'a bee bene. ²⁰Uxe'la Diose li'á para nú ixiule'a bee bedichia' nze'ca quie', enze'e nchiñia ní'cu' nee. Pero una'cuahua lu Diose para nú la lliquia nia equie cuenda'nu tucu nú riala nú nia.

Último bedichia' nú nequie lu ichi' quie'

²¹Tíquico, enu neca tucu bee sa'ahua enu chiqui' se'ca'ahua enu neli rri'i elietsa lua'ahua lunú sibia'ahua lu Jesucristo, li'illa ixiule'ella luhua lu ye nú xa nzucua'a ca'a nu xi rri'i. ²²Xne para enze'e xe'lalla luhua para nú ixiule'ella luhua nú xa nellua'aru ca'a, nu scua du'lla ana arqui'hua.

²³Nacua lu Diose nú ye bee sa'ahua enu nzeli arquia'ahua Jesucristo liqui'nu nú nzuxe arqui'hua, cuna eluseca, cuna nú chililá arqui'hua Pa'ahua Diose nu Jesucristo enu rnibiya!. ²⁴Diose ri'i nú cha nze'ca lu cuenda' ye bee bene enu neli seca Jesucristo enu rnibiya!. Amén.